

Penularan COVID-19

MySejahtera bantu KKM kesan 9,167 kes positif

Pengesanan melalui aplikasi dilaksana dengan dua kaedah

Oleh Rafidah Mat Ruzki
fidahruzki@bh.com.my

Putrajaya: Aplikasi My Sejahtera membantu Kementerian Kesihatan (KKM) mengesan 9,167 kes positif COVID-19, setakat ini.

Ketua Pengarah Kesihatan, Tan Sri Dr Noor Hisham Abdullah, berkata pengesanan kes positif melalui aplikasi itu dilaksanakan dengan dua kaedah.

Kaedah pertama, katanya, penilaian kesihatan sendiri oleh pengguna yang membolehkan kes COVID-19 dikesan apabila seseorang menilai risiko terhadap penyakit berkenaan, mengikut kriteria dalam garis panduan KKM.

Beliau berkata, kaedah kedua membabitkan pengesanan kontak rapat melalui semakan data oleh pejabat kesihatan daerah dengan pangkalan data MySejahtera.

Dr Noor Hisham berkata, 1,561 kes berjaya dikesan dan

disahkan positif COVID-19 dengan menggunakan kaedah penilaian kesihatan sendiri.

Katanya, sebanyak 7,606 kes COVID-19 dikesan positif melalui kaedah pengesanan kontak menggunakan MySejahtera.

“Secara puratanya, kes yang dikesan adalah 18.2- 44.3 peratus dan peratusannya berubah dari semasa ke semasa kerana bergantung kepada jumlah kes harian serta jumlah kes yang menggunakan MySejahtera.

“Untuk tujuan pengesanan kontak, data MySejahtera yang diperlukan akan disalurkan kepada pejabat kesihatan daerah untuk membantu aktiviti lapangan. Data itu akan dianalisis bersama penemuan siasatan lapangan dan seterusnya, menyumbang kepada aktiviti pengesanan kontak.

“Data pengesanan kontak dikumpul melalui modul MySejahtera Check-In apabila rekod kehadiran pengunjung disimpan melalui imbasan kod QR yang dipaparkan di semua premis,” katanya dalam kenyataan media, semalam.

Mengambil contoh penularan baru-baru ini, Dr Noor Hisham berkata, penggunaan aplikasi MySejahtera membantu KKM mengesan 17,260 pengguna mengunjungi pusat beli-belah yang



Dr Noor Hisham Abdullah

terbabit dalam Kluster Utama bagi tempoh tertentu.

Katanya, daripada jumlah itu 1,343 individu dikenal pasti untuk penilaian lanjut oleh pejabat kesihatan daerah.

Beliau berkata, 457 orang daripada mereka disahkan kontak rapat kepada kes positif Kluster Utama dan ujian persampelan seterusnya mengesahkan 221 kes positif COVID-19.

Katanya, daripada 236 kes positif COVID-19 bagi Kluster Utama yang diumumkan pada hari yang sama, 221 kes atau 93 peratus dikesan menggunakan aplikasi pintar MySejahtera.

Pada masa sama, Dr Noor Hisham berkata, aplikasi itu mendapat sambutan amat menggalakkan daripada semua lapisan masyarakat dan

sehingga semalam, ia mencapai 23,953,970 pengguna serta tanggungan yang berdaftar dan 1,058,853 premis perniagaan berdaftar.

“Setakat ini, MySejahtera merekodkan 1.7 bilion jumlah kumulatif check-in ke premis berdaftar menggunakan imbasan kod QR dengan purata 15 juta check-in sehari.

“Selain itu, ia membantu merungkaikan 523,000 persoalan pengguna. Aplikasi ini berjaya mendapat penarafan 4.7 bintang dalam aplikasi Apple Store dan Google Playstore,” katanya.

Selain itu, Dr Noor Hisham berkata, aplikasi MySejahtera menerapkan ciri-ciri keselamatan yang mematuhi piawaian global untuk melindungi kerahsiaan dan keselamatan data.

Beliau berkata, data yang dikumpul melalui MySejahtera bagi tujuan pengesanan kontak saja dengan kuasa mengikut Akta Pencegahan dan Pengawalan Penyakit Berjangkit 1988 dan Akta Perubatan 1971.

Katanya, maklumat peribadi pengguna yang dikumpulkan dilindungi oleh Akta Perlindungan Data Peribadi 2010.

“Data Check-In yang dikumpulkan akan diarkibkan selepas 30 hari dan akan dihapuskan selepas 90 hari,” katanya.